

## Diktatur

Wat ass eigentlech genee eng Diktatur?

Wann ee Grupp vu Leit zesumme wëll Entscheedungen treffen, bedeit dat normalerweis, dass jiddereen eng Stëmm bei dëser Entscheedung huet. De Prinzip ass deeselwechte bei der Ofstëmmung, wat fir ee Film ee mat senger Frënn a Frëndinne kucke geet, wéi bei de Wahle fir en neit Parlament am Land. Dat nennt een dann eng demokratesch Entscheedung. De Géigendeel heivunner ass eng Diktatur.

An enger Diktatur dierfen nëmme ganz wéineg Leit – eng eenzeg Partei oder souguer nëmme eng Persoun, de sougenannten Diktator, fir all déi aner entscheeden.

En Diktator ass meeschtens net gewielt, mee mat Hëllef vum Militär un d'Muecht komm, oder huet dës Muecht vu sengen Eltere geierft.

Diktaturen hunn historesch en autoritäre Charakter. Dat heescht, se ignoréieren aner Meenungen oder verbidden se souguer.

Oft hunn Diktaturen e staarkt Militär fir sech no baussen ze schützen an eng gewaltbereet Police, souwéi Méiglechkeeten zur Iwwerwaachung vum eegene Vollek, fir am Land intern fir Stabilitéit ze suergen. Fir Kontroll ze behalen an domat d'Muecht ze sécheren, ginn an Diktature verschidde Forme vu Repressioun benotzt. Dat si Methode fir aner Meenungen z'ënnerdrécken an Angscht ze verbreeden.

Aus dësem Grond verspiere vill Leit an Diktature Roserei iwwer Ongerechtegkeeten, mee hunn Angscht hir Meenung ze soen, well ganz dacks d'Police, d'Gesetzer an d'Gerichter vun der Diktatur net onparteesch sinn. Demonstratioune géint d'Diktatoren ginn oft vun der Police ugegraff. Politesch Géigner oder Géignerinnen (sief et Journalisten a Journalistinnen, Politiker a Politikerinnen oder souguer Kënschtler a Kënschtlerinnen) gi verfollegt, kommen dacks an de Prisong oder souguer an Aarbechtslager. Famillje ginn ageschüchtert a Frënn vun deenen, déi sech wieren, gëtt d'Liewe schwéier gemaach. Vill Leit, déi sech géint Diktaturen ausschwätzen, mussen fréier oder spéider aus dem Land flüchten a politescht Asyl an engem anere Land sichen, fir z'iwwerliewen.

Et gëtt verschidde Forme vun Diktaturen:

- E Monarch kann och en Diktator sinn, wann hien eleng all Entscheidungsmuecht an engem Land huet. Dat nennt een dann eng absolut Monarchie. Zu Lëtzebuerg hu mir zwar ee Monarch als Staatsoberhaupt, de Grand-Duc, dësen huet allerdéngs nëmme ageschränkte Muecht a gëtt vum Staat bezuelt, fir Lëtzebuerg ze representéieren. Déi politesch Muecht läit beim Parlament, dofir si mir zu Lëtzebuerg eng parlamentaresch Monarchie a wäit ewech vun enger Diktatur.

# POLITIKLEXIKON



- Eng Militärdiktatur ass eng a Diktatur, an där d’Militär all politesch Kontroll huet. Am 20. Joerhonnert gouf et dëser Diktaturen ëmmer erëm, ënner anerem a Latäinamerika. Militärdiktature sinn dacks vu staark rietsem Gedankegutt geprägt.
- En totalitäre Staat ass eng Diktatur, an där de Staat op all Aspekter vum Liewe vun de Bierger a Biergerinne wëll Afloss huelen. Däitschland ënnert den Nazie war en totalitäre Staat, dee mat Kricher probéiert huet, déi nationalistesch Ziler z’erreechen. Leit, déi hirem Feindbild entsprach hunn, wéi ënner anerem Judden, Homosexueller, Sinti a Roma oder Mënsche mat Behënnerungen, goufen ermort.

Eng Diktatur, déi am Moment vill an den Noriichte virkënnt, ass d’Diktatur an Nordkorea.